

1606 *ribus cum Summis Pontificibus pertractasse; neminem anathematis fulmen, ne in minores quidem Principes vel intor-
sisse vel arripuisse. Tum Matthæjus, Christi tandem Vica-
rio obtemperandum esse, inquit. Illico Princeps: Liben-
ter obtemperaturum, si ea, quæ Christus jusserat, a Ponti-
fice præciperentur. Hæc atque alia incalescentibus animis ja-
ctata.*

*Matthæjus
Nātius Ve-
netiis disce-
dit.*

*Senatus
Nanium a
legatione
revocat.*

*Augustini
Valerii,
Cardinalis,
obitus.*

*Venetorum
subjecti opes
suas Reipu-
blicæ offe-
rant.*

Verum postridie ejus diei Matthæjus, discessus venia a Se-
natu postulata, Romam est profectus. Eadem die per dispo-
sitos equos Nanio injunctum, ut statim, Hieronymo Zonio,
qui negotia Reipublicæ obiret, privato Romæ relicto, in pa-
triam revertatur: nondum enim Senatui compertum erat, a
Pontifice Nanium oratorem dimissum. Ad Veronæ ac Vice-
tiæ Cardinales datæ literæ, quibus, ut patriæ res juvarent,
Zonio pro rerum temporumque opportunitate faverent, pe-
tebatur. At Valerius ab exortis inter Paulum ac Rempubli-
cam diffidiis, incredibili mœrore animi affectus, levique fe-
bricula correptus, ingravescente jam ætate, per eos dies oc-
cubuit; vir sane doctrina vitæque sanctitate illustris, qui,
variis in lucem editis scriptis, suum immortalitati nomen
consecravit, atque eximium in patriam amorem nullo non
tempore clarissimis argumentis patefecit. Obtestatio typis ex-
cusa, conspicuis, insignioribusque urbis locis, in basilicarum
templorumque valvis affigi jussa, perque omnes Venetorum
ditiones missa; Collegii Patribus, ut Romam perferendam
curarent, injunctum. Literæ ad subjectos omnes datæ, qui-
bus, quæ inter Pontificem ac Rempublicam acciderant, signi-
ficantur; ad eorum bona, vitam, existimationem tuenda re-
tinendaque eas contentiones susceptas; quidquid opum, quid-
quid auri, quidquid virium in Republica sit, ea omnia ad
illorum utilitatem decusque collaturam. Hæc a singulis vel
urbium, vel oppidorum magistratibus in publicis civium cœ-
tibus perlecta, mirum quam cunctorum animos inflammave-
rint, quantos illis stimulos in Venetum nomen caritatis ad-
diderint. Omnes certatim opes, fortunas offerre. Legati, qui
ab universo imperio Veneto principatum Donato gratulaturi
ad urbem accedebant, gratulationibus oblationes miscere;
vitam, fortunas Reipublicæ devovere. Neque minor in ec-
cle-